

Idris jelaskan mengapa subsidi mesti dikurangkan
Malaysiakini.com
May 21, 2011

Memansuhkan subsidi barangan keperluan utama amat memeritkan jika tindakan itu dilakukan dengan cepat dan spontan.

Justeru, apabila mengurangkan subsidi, ia perlu dijalankan secara berperingkat dan perlahan - demikian permintaan rakyat, kata Menteri di Jabatan Perdana Menteri, Datuk Seri Idris Jala.

“Lazimnya, menerusi perbualan dengan rakyat, mereka memahami mengapa subsidi tidak boleh diberikan berterusan. Tetapi kata mereka, perlahan-lahan lah, jangan naikkan harga secara mendadak,” katanya dalam wawancara dengan Malaysiakini di Putrajaya Khamis lalu.

Dilantik sebagai ketua pegawai eksekutif Unit Pengurusan Prestasi dan Pelaksanaan (PEMANDU) sejak setahun setengah yang lalu, Idris kerap kali bertemu rakyat bagi menjelaskan mengapa subsidi perlu dimansuhkan.

“Kami gunakan SMS, bancian, sesi penerangan di dewan. Terdapat komen fundamental. Mereka beritahu lakukan secara kecil dan naikkan harga beberapa kali dalam jangka masa yang panjang. Itu yang telah kami lakukan...”

“Kami mempunyai plan rasionalisasi... saya fikir rakyat perlu membiasakan diri hingga mereka kata ia adalah okay,” katanya.

Mengikut cadangan struktur harga petrol RON95 yang lazimnya digunakan oleh kebanyakan pemilik kenderaan kelas pertengahan dan rendah, bahan api itu sepatutnya dinaikkan 15 sen menjadi RM2.05 seliter sekarang ini dan dinaikkan 10 sen lagi menjelang akhir tahun ini.

Tahun lalu, petrol RON95 dinaikkan dua kali - lima sen seliter setiap kali pada Julai dan Disember.

Jika plan PEMANDU diikuti sepenuhnya, harga petrol RON95 akhirnya akan dinaikkan kepada RM2.60 seliter menjelang 2015.